

Universal Declaration of Human Rights - Hawaiian

© 1996 – 2009 The Office of the High Commissioner for Human Rights

This HTML version prepared by the UDHR in Unicode project, <http://www.unicode.org/udhr>.

Universal Declaration of Human Rights

I ka lā 10 o Dēkēmapa, M.H. 1948, ua ho'oholo a kaūkala ka 'Aha 'Ōlelo o Nā Aupuni Hui Pū 'Ia i ka Hō'ike No Nā Pono Kanaka O Ke Ao Nei, ka palapala holo'oko'a ho'i e hō'ike 'ia ana ma nā 'ao'ao ma lalo iho nei. Ma muli o kēia hana kūikawā, ua kuahaua ka 'Aha 'Ōlelo i nā Lālā e ho'olaha i ka 'ōlelo o ka Hō'ike "e ho'olaha, hō'ike'ike, kūkala leo, a e kāko'o 'ia aku ma nā kula a me nā wahi ho'ona'auao 'ē a'e, me ka ho'okae 'ole aku i ke kulanā politika o nā aupuni a me nā panalā'au."

ŌLELO MUA

'Oiai, 'o ka ho'omaopop 'ana i ka hanohano, a me nā pono kivila i kau like ma luna o nā pua apau loa o ka 'ohana kanaka ke kumu kahua o ke kū'oko'a, ke kaulike, a me ka maluhia o ka honua, a

'Oiai, 'o ka hehikū a me ka ho'owahāwahā i ka pono kivila o ke kanaka ke kumu o ka hana loko'ino, ka mea ho'i i pi'i ai ka inaina o ka luna'ikehala o kānaka, a ua kūkala 'ia ho'i ka wehena o ke ao e noo ia nā maka 'āinana apau me ke kū'oko'a o ka 'ōlelo a me ka mana'o, me ka maka'u 'ole, a

'Oiai, he mea nui ka ho'opakele 'ana o ke kānāwai i nā pono kivila o kānaka, inā ho pono nō e 'imi i ke ala o ke kipi 'ana i ka hainā a me ka ho'oluhi hewa wale, a

'Oiai, he mea nui ka ho'okō 'ana i ka pili aloha mā waena o nā aupuni, a

'Oiai, ua hō'ia ka po'e o Nā Aupuni Hui Pū la ma o ka Palapala Ho'ohui lā, i ka hilina'i i ke kumu kahua o nā pono kivila o kānaka, i ka hanohano a me ka waiwai o kānaka, a me ke kau like 'ana o nā pono kivila ma luna o ke kāne a me ka wahine, a i ho'oholo ho'i e alu like i ka ho'opi'i 'ana i ke kulanā o ka nohona kanaka o ke ao noa a,

'Oiai, ua ho'ohiki Nā Aupuni Lālā i kā lākou 'ōlelo e ho'okō, ma ke alu like 'ana me Nā Aupuni Hui Pū 'Ia, ka paipai 'ana i ke ao kanaka e mahalo i ke kumu kahua pa'a o nā pono kivila kanaka,

'Oiai, 'o ka ho'omaopopo like 'ana i kēia mau pono kivila ka mea nui e kō ai kēia 'ōlelo ho'ohiki,

No laila, ke KUAHAUA nei KA 'AHA 'ŌLELO, 'o ka HŌ'IKE I NĀ PONO KĪVILA O KE AO NEI ka pae ho'ohālikelike, kahi e pi'i like ai nā lāhui a me nā aupuni apau loa, i kū kēlā kanaka, kēia kanaka, a me kēlā hui, kēia hui, me ka ho'omaopopo mau i kēia Hō'ike, ma o ka ho'ona'auao 'ana, i hō'ihī'ihī 'ia nā pono kivila ma ke ala e holumua ai ke aupuni, a i waena ho'i o nā aupuni, a pa'a pono ka 'ike a i ho'okō 'ia ho'i e nā Aupuni Lālā a me ka po'e o nā panalā'au e noho ana i ka malu o lākou.

Paukū 1

Hānau kū'oko'a 'ia nā kānaka apau loa, a ua kau like ka hanohano a me nā pono kivila ma luna o kākou pākahi. Ua ku'u mai ka no'ono'o pono a me ka 'ike pono ma luna o kākou, no laila, e aloha kākou kekahi i kekahi.

Paukū 2

Ua noa i nā kānaka apau loa nā pono kivila i helu 'ia ma kēia Hō'ike, me ka ho'okae 'ole i ka lāhui, i ka wai ho'olu'u o ka 'ili, i ke kāne a i 'ole ka wahine ka 'ōlelo, ka ho'omana, ka mana'o politika a me nā mana'o 'ē a'e, ka 'āina a pilina paha i hānau 'ia ai, ka waiwai, ke kulanā hanauna a me nā kulanā 'ē a'e.

Eia ho'i, 'a'ole e ho'okae 'ia ke kanaka ma muli o ke kulanā politika a me ke kuleana kūloko a kūwaho ho'i o kona aupuni nona mai 'o ia, inā paha he aupuni kū'oko'a he 'āina noho kahu 'ia, a i 'ole ho'i he 'āina i kaupalena 'ia kona kū'oko'a 'ana.

Paukū 3

Ua noa i nā kānaka apau ke ola, ka mōhalu, a me ka maluhia.

Paukū 4

ʻAʻole e noho kauā kaupaʻa ke kanaka; ua pāpā ʻia ka noho kauā kuapaʻa, a me ka hoʻokuapaʻa ʻana ma nā ʻano apau loa.

Paukū 5

ʻAʻole e hoʻomāinoino ʻia ke kanaka, ʻaʻole hoʻi e hoʻopaʻi ʻino ʻia ke kanaka i kū like ʻole i ke kūlana kanaka.

Paukū 6

E ʻike ʻia nā kānaka ma nā wahi apau, he kanaka i ka malu o ke kānāwai.

Paukū 7

Ua kau like ke kānāwai ma luna o nā kānaka apau, a e palekana ʻia e ke kānāwai me ka hoʻokae ʻole. Ua palekana ʻia nā kānaka i ka hoʻokae ʻole ʻia, i pāpā ʻia e kēia Hōʻike, a ua palekana ʻia hoʻi i ka mea e hōʻeuʻeu ana i ka hoʻokae.

Paukū 8

Ua noa i nā kānaka apau ka hoʻoponopono ʻia ʻana e ka ʻaha lunakānāwai mākaukau o ke aupuni, o nā hana a ʻaʻe ana i kona pono kīvila i hōʻike ʻia ma ke kumukānāwai.

Paukū 9

ʻAʻole e hopu, hoʻopaʻahao, a hoʻokuewa wale ʻia ke kanaka me ke kumu ʻole.

Paukū 10

Ua noa i nā kānaka apau e hoʻokolokolo pono ʻia i mua o ka lehulehu e ka ʻaha lunakānāwai kūʻokoʻa a kaulike hoʻi, no ka hoʻoholo ʻana i ka pono kīvila a me ke kuleana, a me nā mea i hoʻopiʻi ʻia iā ia.

Paukū 11

1. Ua noa i nā kānaka apau i hoʻopaʻi ʻia no ke kalaima, ka noʻonoʻo ʻana i kona hewa ʻole, a hōʻoia pono ʻia kona ʻaʻe i ke kānāwai, ma ka hoʻokolokolo ʻana i mua o ka lehulehu, a i mālama ʻia hoʻi nā mea apau e pono ai kona ʻaoʻao kūplae.

2. ʻAʻole e hoʻopaʻi kalaima ʻia ke kanaka i helu ʻole ʻia kāna hana he kalaima ma ke kānāwai aupuni a i ʻole ma ke kānāwai ma waena o nā aupuni i ka wā i hana ʻia ai. ʻAʻole hoʻi e hōʻoi ʻia aku ka hoʻopaʻi ma luna o ka hoʻopaʻi e kū ana i ka wā i hana ʻia ai ke kalaima.

Paukū 12

ʻAʻole e ʻākeʻakeʻa kumu ʻole ʻia nā mea pilikino, ka ʻohana, ka home, a me ka hoʻolaha ʻike o ke kanaka, ʻaʻole hoʻi e hoʻāhewa wale ʻia kona hanohano a me kona kūlana. Ua noa i nā kānaka apau ka palekana o ke kānāwai i ke ʻākeʻakeʻa a me ka hoʻāhewa wale ʻia.

Paukū 13

1. Ua noa i nā kānaka apau ka pono kīvila o ka hele a noho ʻana ma loko o ka palena o ke aupuni.

2. Ua noa i nā kānaka apau ka ha'alele 'ana i kēlā aupuni, kēia aupuni, a me kona aupuni iho, a ua noa ka ho'i 'ana i kona aupuni.

Paukū 14

1. Ua noa i nā kānaka apau ka 'imi 'ana i nā aupuni pu'uhonua, kahi e noho maluhia ai.

2. E 'au'a 'ia kēia pono kivila o ke kanaka i ho'opa'i 'ia no ka hewa i pili 'ole i ka politika, a me ka hewa i kū'ē 'ē i ka pahuhopu a me nā loina o Nā Aupuni Hui Pū 'Ia.

Paukū 15

1. Ua noa i nā kānaka apau ka noho 'ana maka'āinana o ke aupuni.

2. 'Aole e 'au'a wale 'ia ka noho 'ana maka'āinana o ke kanaka, a 'a'ole ho'i e 'au'a 'ia ka noho 'ana he maka'āinana o kekahi aupuni 'ē aku.

Paukū 16

1. Ua noa i nā kāne a me nā wāhine i lawa ai nā makahiki, ka male 'ana a me ka ho'okumu 'ana i 'ohana, me ke kaupalena 'ole 'ia ma muli o ko lāua lāhui, ke aupuni, a i 'ole ko lāua ho'omana. Ua kau like nā pono kivila male i ka noho male 'ana, a me ka wā e pau ai ka noho male 'ana.

2. E male nā kānaka wale nō i koho la'ela'e e noho male.

3. 'O ka 'ohana ke kumu pa'a o ke kaiāulu kanaka, a ua noa i ka 'ohana ka palekana o ke kaiāulu a me ke aupuni.

Paukū 17

1. Ua noa i nā kānaka apau ka 'ona ho'okahi 'ana i ka waiwai, a me ka 'ona pū 'ana ho'i me nā kānaka 'ē a'e.

2. 'A 'ole e 'au'a kumu 'ole 'ia ka waiwai lewa a waiwai pa'a paha o ke kanaka.

Paukū 18

Ua noa i nā kānaka apau ke kū'oko'a o ka mana'o, ka luna'ikehala, a me ka ho'omana; ua noa nō ho'i ka ho'ololi 'ana i kona ho'omana a i 'ole kona mana'o, a ua noa ho'i i ke kanaka ho'okahi, a i 'ole nā kānaka he nui ka hō'ike 'ana i ka paulele i ka ho'omana, i mua o ka lehulehu a i 'ole ma kahi ka'awale, ma o ke a'o a me ka haipule 'ana i kona akua.

Paukū 19

Ua noa i nā kānaka apau ke kū'oko'a o ka mana'o a me ka hō'ike 'ana i ka mana'o; 'a'ole ho'i e ho'opilikia 'ia, a ua noa ho'i ka 'imi, ka loa'a, a me ka ho'olaha 'ana aku i ka 'ike ma nā 'ano apau, a i 'ō aku ho'i o nā palena 'āina apau.

Paukū 20

1. Ua noa i nā kānaka apau ka hui maluhia 'ana me nā kānaka 'ē a'e.

2. 'Aole e koi 'ia ke kanaka e komo i ka hui.

Paukū 21

1. Ua noa i nā kānaka apau ke komo 'ana i ka hana a kona aupuni ma ona lā, a i 'ole ma o ka 'elele i koho la'ela'e 'ia.

2. Ua noa i nā kānaka apau ke kōkua o ke aupuni i ho'okumu 'ia no nā maka'āinana.

3. 'O ke kauoha a ka lehulehu ke kumu o ka mana aupuni; e kauoha 'ia ka 'i'ini o ka lehulehu ma o ke koho pāloka 'ana i mālama maoli 'ia i kēlā wā, kēia wā; ua noa i nā kānaka apau loa ke koho malū 'ana i 'ole ma ke ka'ina hana i kūlike a kū'oko'a.

Paukū 22

Ua noa i nā kānaka apau, nā lālā ho'i o ke kaiāulu, ka pono o ka lawelawe mālama ola i ho'okō 'ia ai ho'i, ma ke kākō'o 'ana o ke aupuni, a me ke kākō'o 'ana o nā aupuni 'ē a'e, a i kūlike me ka waiwai o ke aupuni, a me nā pono a me nā loina pa'a mau o ke kaiāulu, no ka hanohano o ke kanaka a me kona ulu la'ela'e 'ana.

Paukū 23

1. Ua noa i nā kānaka apau ka pono kivila o ka hana, ke 'ano kūpono o ka hana, a me ka palekana i ka nele i ka hana 'ole.
2. Ua noa i nā kānaka apau, me ka ho'okae 'ole, ka uku ho'okahi i kūlike i ka hana ho'okahi.
3. Ua noa i nā kānaka hana apau ka uku kaulike e pono ai ka noho 'ana ona a me kona 'ohana i kū i ka hanohano kanaka, a inā he pono, e kūpale 'ia e ka lawelawe kaiāulu.
4. Ua noa i nā kānaka apau ka ho'okumu a me ke komo 'ana i nā uniona kālepa i palekana ai kona pono.

Paukū 24

Ua noa i nā kānaka apau ka ho'omaha a me ka luana 'ana, a me nā hola hana i kaupalena pono 'ia, a e uku 'ia o ia no kekahi mau lā nui o ka makahiki.

Paukū 25

1. Ua noa i nā kānaka apau ke kūlana nohona e pono ai ke ola ona a me kona 'ohana, 'o ia ho'i, 'o ka mea 'ai, ka lole, ka hale, ka lawelawe olakino, a me nā lawelawe kaiāulu e pono ai, a e mālama 'ia ho'i i ka wā pō'ino o ka nele i ka hana 'ole ka ma'i, ke kīnā, ka nohona kāne make o nā wāhine, ka wā 'elemakule, a me nā pō'ino 'ē a'e e kau mai ana i hiki 'ole ke 'alo a'e.
2. Ua noa i ka noho 'ana makuahine a me ka noho 'ana kamali'i ke kōkua kūikawā. E palekana 'ia nā keiki apau loa i hānau 'ia mai e nā mākau male a male 'ole paha.

Paukū 26

1. Ua noa i nā kānaka apau ka ho'ona'auao 'ana. E manuahi ka ho'ona'auao 'ana, ma ka li'ili'i loa, ma ke kula ha'aha'a a me nā paepae kahua o ka ho'ona'auao. He koina pa'a ka ho'ona'auao 'ana ma ke kula ha'aha'a. E noa ka ho'ona'auao 'ana i nā oihana loea like 'ole, a e noa nō ho'i ke kulanui i nā kānaka apau i mākaukau.
2. E kālele ka ho'ona'auao 'ana i ka ulu kūpono 'ana o ke kanaka, a me ka ho'oikaika 'ana i ka mahalo i ka pono kivila apau o kānaka. E paipai 'ia ka ho'omaopopo le'a, ke ahonui, a me ka pili aloha i waena o nā aupuni, nā hui pili koko a me nā hui ho'omana, a e ho'oholumua i ka hana o Nā Aupuni Hui Pū 'Ia no ka mālama 'ana i ka maluhia.
3. Ua noa i nā mākau ke koho mua 'ana i ke 'ano o ka ho'ona'auao 'ana i kā lāua mau keiki.

Paukū 27

1. Ua noa i nā kānaka apau ke komo 'ana i ka nohona ku'una o ke kaiāulu, ka luana 'ana i nā mea no'eau, a me ke ka'ana like 'ana i ka loa'a mai o ka holumua 'epekema.
2. Ua noa i nā kānaka apau ka palekana 'ana i na pono e loa'a mai ana mai ka hana 'epekema, ka palapala, a i 'ole ka mea no'eau āna i haku ai.

Paukū 28

Ua noa i nā kānaka apau ka nohona i ho'onohonoho 'ia ma kona aupuni a me nā aupuni apau, kahi e kō ai nā pono i helu 'ia ma kēia Hō'ike.

Paukū 29

- 1. He kuleana ko nā kānaka apau i kona kaiāulu, kahi e ulu ai ke kanaka me ke kū'oko'a.*
- 2. I ka ho'okō 'ana i nā pono kīvila, e 'ae nā kānaka apau i nā palena wale nō i ho'okau 'ia e ke kānāwai no ka mālama 'ana i ka ho'omaopopo pono a me ka mahalo aku i nā pono kīvila o ha'i, i kū i ka pono a me ka maluhia o ke aupuni o ka lehulehu.*
- 3. 'A'ole loa e lilo kēia mau pono kīvila i mea e kū'ē'ē ana i ka pahuhopu a me nā lōina o Nā Aupuni Hui Pū 'Īa.*

Paukū 30

'A'ole loa e kuhikuhi 'ia nā mea o kēia Hō'ike he mau mea kōkua i ke Aupuni, ka hui, a i 'ole ke kanaka, ma ke komo 'ana a i 'ole ma ka ho'okō 'ana i ka hana nona ka mana'o e luku wale i nā pono kīvila i helu 'ia mai ma luna a'e nei.
